

canzelier che si vederà. El qual Contarini è partito et torna a Venexia. *Item*, come di fioli par sia stà suspeso el render, fino el re non li dagi tutti li danari promessi.

Di Cremona, di l'orator Venier, di . . .

Come il Signor stà meo, et quelli voriano l'andasse a Milan; ma lui vol prima venir in questa terra da la Signoria et fermarsi, si etc.

81* Noto. Il protonotario Carazolo, orator cesareo, eri et hozi parloe molto al Serenissimo, dicendo haver inteso che il Re di Anglia ha fato far certi consigli a li dotori de Padoa, et subornato li dotori azio consigli a suo favor, et voria el favor de la Signoria; però la Signoria advertissa a farlo, chè saria in dispiacer di Cesare. Il Serenissimo li disse: « Vui vegnirè in Collegio, vi aldiremo ».

A dì 16, sabo santo. Il Serenissimo in veludo cremexin vene a la messa pasqual con li oratori soliti, mancava el cesareo. Et compito, il Collegio si reduseno di suso, per terminar el luogo se dia dar al duca di Baviera, qual vol venir doman publicamente in coro, et fo terminato.

Et nota. Heri li fo mandà a donar uno storion vivo, del quale ave grande apiacer; hozi ha visto le zoie, et è stato a Muran a veder far veri.

Da poi disnar, non fo nulla, nè alcun di Savi si redusse.

Noto. Hozi, che è vizilia de Pasqua, fo pochissima carne de manzo in beccaria, et le ove valseno 9 et 10 al grosso, sichè è carestia de ogni cosa, da formenti in fuora, che vale el mior lire 4 e manco il staro, et *etiam* di vin è bon mercato; el sorgo, che valse lire 9 il staro, non si trova a danari, val soldi 6 il staro.

A dì 17, fo el zorno de Pasqua. Il Serenissimo, vestito di . . . , vene in chiesa a la messa con li oratori, et fo mandato alcuni zentilhomeni zoveni con li Savi a Terra ferma a levar el duca di Baviera, el qual el Serenissimo lo trovò zoso di la scala et lo tolse a man, ponendolo, come era il dover, di sora li oratori. Introno in chiezia, et uno altro zentilhomo suo todesco, qual havia un gran capello in testa, ave luogo de sora i consieri. Et cussì alditeno la messa pasqual.

Di Mantova, fo lettere del Tiepolo orator, di 15. Come la Cesarea Maestà dovea partir, per quanto ha inteso, il marti di Pasqua, per andar verso Trento.

Da poi, il Serenissimo, vestito con un manto d'oro di . . . , con il bavaro di armelini et bareta d'oro, con le cerimonie ducal et la bareta

di zoie, portata avanti in una confetiera, et il duca di Baviera, vestito di veludo negro, per il qual fo mandato, et si scontrò a la fin de la scala, et li oratori tutti veneno in chiesa a la predica, qual predicoe el predicator de San Stefano, nominato maistro . . . , qual poi *etiam* andò a predicar a San Stefano. Et compito, il Serenissimo andò a vespero, justa il solito, a San Zaccaria, al perdon plenario. Portò la spada sier Antonio Justinian, va capitano a Brexa, in veludo violetto. Fo suo compagno sier Zuan Maria Malipiero è sora le Pompe, in damaschin cremexin. Era *etiam* el primocierio di San Marco et lo episcopo di Baffo, et 4 altri vescovi, *videlicet* . . . *Item*, questi Procuratori: sier Domenego Trivixan, sier Alvise Pasqualigo, sier Lorenzo Loredan, sier Andrea Justinian et . . . , sier Giacomo Soranzo, sier Lorenzo Pasqualigo, sier Lorenzo Justinian, sier Marco da Molin, sier Francesco Mocenigo, sier Vincenzo Grimaldi et sier Zuan da Leze, et altri patrici, el forzo zoveni, pur erano alcuni di vechi; et sier Vettor Morexini in panno paonazo per far bello el triumpho. Et poi nel ritorno, zonto a la scala de piera, el Serenissimo tolse licentia dal ditto duca et da li oratori, et il duca con li oratori cesarei, Milan et Ferrara et 12 zentilhomeni fo acompagnato fino a la soa habitation in chà Dandolo.

Noto. Il venere santo zonse sier Zuan Francesco Justinian, soracomito, di sier Hironimo procurator, vien a disarmar.

A dì 18, luni de Pasqua. Vene in Collegio sier Francesco Dandolo, venuto capitano de le galle de Alexandria, vestito de veludo cremexin, et referite justa el solito.

Veneno li do oratori cesarei dicendo haver sentito che il re de Inghilterra vol far far alcuni consey a Padoa zerca el devortio vol far di la regina, il che è contra el voler de la Cesarea Maestà.

Poi disse el Carazolo non haver da negotiar alcuna cosa, et vol andar a la sua legation apresso el signor duca de Milan, et cussì partirà. Et accertava questa Signoria il bon voler di Cesare, ancora che l'vadi in Alemagna.

Noto. El disse che l'havia ditto a Cesare che l'suo orator domino Rodorico Brogno non havia voluto acetar li do tazoni d'oro li donò questa Signoria. Soa Maestà disse: « L'ha fatto ben, ma havendo fatto una paxe et amicitia con quella Signoria, son contento che lui le accetti.

Vene prima de questi oratori in Collegio sier Giacomo Memo di sier Nicolò, venuto proveditor del